

MINISTERIO DE ECONOMÍA E FACENDA

b) Para cada análise de praguicidas realizada:

- 1.º Cultivo ou colleita mostraxeados.
- 2.º Substancias activas detectadas.
- 3.º Número do boletín de análise e laboratorio que o realiza.

c) Para cada colleita ou cada partida de colleita comercializada:

- 1.º Produto vexetal.
- 2.º Cantidade deste expedida.
- 3.º Nome e enderezo do cliente ou receptor.

A información a que se refire a letra b) corresponde ás análises realizadas por propia vontade do agricultor, ou por exixencias do sistema de produción que practique, así como ás realizadas en controis efectuados sobre as súas colleitas que lle foron notificados polos servizos oficiais.

2. Considérase cumprido o requisito a que se refire o punto anterior en todos aqueles casos en que o agricultor manteña actualizado, para outros fins ou compromisos, un rexistro de datos da explotación en que consten, polo menos, os ditos datos.

3. O rexistro manterase á disposición da autoridade competente de cada comunidade autónoma durante un período mínimo de dous anos, contados a partir da finalización de cada campaña agrícola.

4. Este rexistro será exixido na realización dos controis oficiais para a verificación do cumprimento das disposicións en materia de utilización de produtos fitosanitarios, establecidas polo Real decreto 2163/1994, do 4 de novembro, polo que se implanta o sistema harmonizado comunitario de autorización para comercializar e utilizar produtos fitosanitarios e pola Lei 43/2002, do 20 de novembro, de sanidade vexetal.

Artigo 4. Documentación.

Os agricultores deberán manter á disposición da autoridade competente:

a) Os documentos que xustifiquen os asentos realizados no rexistro de datos da explotación, como facturas de adquisición de produtos fitosanitarios, contratos coas empresas de tratamentos, boletíns de análise, albarás ou facturas de venda e, en caso de non dispoñer do número de rexistro da explotación, o documento do número de identificación fiscal do titular da explotación.

b) Unha relación das parcelas que integran a explotación, identificadas mediante as súas respectivas referencias no Sistema de Información Xeográfica da Política Agrícola Común, SIXPAC.

Disposición derradeira primeira. Título competencial.

Esta orde dítase ao abeiro do artigo 149.1.13.ª da Constitución, que lle atribúe ao Estado a competencia exclusiva sobre as bases e coordinación da planificación xeral da actividade económica.

Disposición derradeira segunda. Entrada en vigor.

Esta disposición entrará en vigor aos tres meses da súa publicación no Boletín Oficial del Estado.

Madrid, 9 de febreiro de 2007.–A ministra de Agricultura, Pesca e Alimentación, Elena Espinosa Mangana.

3524 *ORDE EHA/339/2007, do 16 de febreiro, pola que se desenvolven determinados preceptos da normativa reguladora dos seguros privados.* («BOE» 44, do 20-2-2007.)

A Orde do 23 de decembro de 1998, pola que se desenvolven determinados preceptos da normativa reguladora dos seguros privados e se establecen as obrigacións de información como consecuencia da introdución do euro, supuxo en esencia un grande avance respecto á regulación do réxime de estimación da provisión de seguros de vida cando a entidade asignase investimentos a determinadas operacións de seguro, calculando esta aplicando un tipo de xuro estimado en función da taxa interna de rendibilidade dos referidos investimentos. Así mesmo, a citada orde serviu para desenvolver os requisitos exixibles para a utilización de instrumentos derivados con finalidade de cobertura de riscos.

Desde a súa entrada en vigor, o 1 de xaneiro de 1999, sucedéronse e véñense producindo cambios no contorno financeiro, dos produtos de seguros e regulatorio, que aconsellan a revisión das súas disposicións.

Esta orde ten por obxecto a adaptación, modificación e actualización do contido da Orde do 23 de decembro de 1998 á realidade dos mercados financeiros e ás necesidades actuais das entidades aseguradoras respecto ao marco da inmunización financeira e ao réxime dos seus investimentos. A diversidade de cambios e precisións que se introducen respecto ao texto da Orde do 23 de decembro de 1998 aconsellan a súa incorporación nunha nova orde que, ao tempo de recoller os cambios citados, reproduza aqueles preceptos que non sufriron modificación ningunha.

Neste contexto, derrógase a práctica totalidade da Orde do 23 de decembro de 1998, coa excepción do artigo 1, pasando o resto das súas disposicións e as correspondentes modificacións a integrar esta orde; derróganse tamén as disposicións subsistentes da Orde do 24 de xullo de 2001, pola que se aproban os modelos de información que subministrarán entidades aseguradoras; así como a Orde ECO/77/2002, do 10 de xaneiro, que modificou a Orde do 23 de decembro de 1998.

Con relación á inmunización financeira, ampliáanse as categorías de activos que poden ser utilizadas, aclárase o concepto de grupo homoxéneo de pólizas e o prazo para a verificación do cumprimento das hipóteses e requisitos que resulten exixibles, e introdúcese a posibilidade de estender o seu marco xurídico ás pólizas con prima periódica. Respecto á inmunización por casamento de fluxos, aclárase o réxime para estimar o tipo de xuro da provisión de seguros de vida cando se conte con activos asignados por un importe superior ao necesario para lles dar cumprimento aos requisitos. En canto á inmunización por duracións financeiras, delimitase o requisito da equivalencia das duracións financeiras corrixidas e sensibilidades dos activos e pasivos, así como a perturbación da curva de tipos que se realizará para a análise de sensibilidades.

Con relación ao réxime dos bens e dereitos en que poden investir as entidades aseguradoras, e en desenvolvemento do réxime xurídico contido no Regulamento de ordenación e supervisión dos seguros privados, aprobado polo Real decreto 2486/1998, do 20 de novembro, precísase a delimitación dos instrumentos derivados, os requisitos que lles resultan exixibles segundo teñan ou non a condición de negociados en mercados regulados

do ámbito da Organización para a Cooperación e o Desenvolvemento Económico (OCDE), concrétase o concepto de activo financeiro estruturado, a súa tipoloxía e os requisitos que ten que cumprir.

Adicionalmente, precísase que hai que entender, para os efectos da norma, por axentes financeiros e permutas de fluxos certos ou predeterminados, así como cando hai que supor pechada unha posición en instrumentos derivados adquiridos con finalidade de investimento.

Polo demais, incorpóranse ao seu articulado, conforme a redacción contida na Orde do 23 de decembro de 1998, as disposicións relativas á activación e aptitude para cobertura dos recobramentos no seguro de crédito e caución, á aptitude para cobertura de provisiones técnicas dos seguros agrarios combinados, ao concepto de sinistralidade e á delimitación das cualificacións aplicables para a determinación das primas de risco que se aplicarán na valoración dos títulos de renda fixa.

A disposición derradeira segunda do texto refundido da Lei de ordenación e supervisión dos seguros privados, aprobado polo Real decreto lexislativo 6/2004, do 29 de outubro, habilita o ministro de Economía e Facenda para desenvolver o seu regulamento en canto sexa necesario e así se prevexa nel. A disposición derradeira segunda do Real decreto 2486/1998, do 20 de novembro, polo que se aproba o Regulamento de ordenación e supervisión dos seguros privados, habilita o ministro de Economía e Facenda para realizar o desenvolvemento normativo das disposicións contidas no Regulamento de ordenación e supervisión dos seguros privados, en canto sexa necesario para a súa mellor execución e desenvolvemento.

Na súa virtude, de acordo co Consello de Estado, dispoño:

Artigo 1. Requisitos que deben cumprir os axentes financeiros.

Para os efectos do disposto no artigo 50.1.a).3.º do Regulamento de ordenación e supervisión dos seguros privados e no artigo 6 desta orde, os axentes financeiros deberán ser entidades financeiras ou sociedades de valores do ámbito da OCDE suxeitas a supervisión prudencial da autoridade de control dos respectivos Estados, dedicadas de forma habitual e profesional á realización de operacións deste tipo e que teñan solvencia suficiente. Para estes efectos, presumirase que a solvencia é suficiente cando conte con cualificación crediticia favorable dunha axencia especializada de recoñecido prestixio e se inclúa entre os tres primeiros grupos de máis alta cualificación crediticia a que se refire o artigo 17 desta orde.

Artigo 2. Adecuación dos investimentos asignados a determinadas operacións de seguro, en función dos importes e vencementos dos fluxos de cobramento e das obrigacións.

1. Para os efectos previstos no artigo 33.2.a) do Regulamento de ordenación e supervisión dos seguros privados, entenderase que os fluxos de cobramento procedentes do activo ou conxunto de activos asignados ao cumprimento das obrigacións derivadas dunha póliza ou grupo homoxéneo de pólizas coinciden suficientemente en tempo e contía co réxime de fluxos probables de pagamento de prestacións e gastos, sempre que o saldo financeiro ao final da operación sexa maior ou igual que cero e que en todos e cada un dos meses se cumpra algún dos seguintes requisitos:

a) Que os fluxos de cobramentos e pagamentos coincidan perfectamente en tempo e contía, ou ben que aqueles sexan anteriores en tempo e iguais ou superiores a estes en contía.

b) Que o saldo financeiro obtido ao final de cada mes, resultante de capitalizar ao tipo de reinvestimento os cobramentos e os pagamentos diarios que se produciñen nese mes e nos anteriores, resulte positivo en todos e cada un dos meses. Para estes efectos, poderase utilizar a simplificación de considerar que todos os pagamentos efectuados en cada mes se fixeron o día 15 deste e que todos os cobramentos efectuados no dito mes se fixeron o último día deste.

c) Que, non resultando positivo algún dos saldos mensuais calculados conforme a letra anterior, o saldo negativo non supere o total de pagamentos correspondentes ao mes en cuestión e aos dous precedentes. Ademais, o saldo negativo en calquera 31 de decembro da operación non poderá superar o 12,5 por 100 dos pagamentos totais do ano natural respectivo. Para estes efectos, os saldos financeiros negativos que se produzan capitalizaranse ao tipo de reinvestimento que corresponda en cada momento incrementado nun 50 por 100.

O tipo de reinvestimento que se utilice será o que resulte en cada momento da aplicación do disposto nos puntos a.1.º ou b.1.º do artigo 33.1 do Regulamento de ordenación e supervisión dos seguros privados. Non obstante, se se aseguran tipos a prazo contratados nun mercado regulado ou mediante operacións de permuta financeira, poderanse ter estes en consideración, tanto para o reinvestimento dos saldos financeiros positivos como, de ser o caso, para a determinación do custo de financiamento dos negativos.

2. De entre os activos aptos para a cobertura de provisiones técnicas relacionados no artigo 50 do Regulamento de ordenación e supervisión dos seguros privados, os activos que se vaian asignar deberán estar incluídos nalgunha das seguintes categorías:

a) Valores negociables de renda fixa, segundo quedan definidos no artigo 17 desta norma. No caso de que incorporen opcións de compra a favor do emisor, o prazo que se computará corresponderá unicamente aos fluxos que se produzan ata o momento do vencemento da primeira opción, excluindo tanto os fluxos posteriores como o correspondente ao exercicio da opción. Tales fluxos poderanse ter en conta, non obstante, desde o momento en que desapareza a continxencia.

b) Depósitos en entidades de crédito e permutas de fluxos predeterminados contratadas con elas.

c) Activos financeiros estruturados a que se refire o artigo 50.1.b) do Regulamento de ordenación e supervisión dos seguros privados e os artigos 9 ao 12 desta orde, sempre que, cumpríndose os requisitos que en cada caso resulten exixibles para a súa consideración como aptos para o investimento das provisiones técnicas, dispoñan de vencemento certo e os seus fluxos nominais sexan certos en prazo e importe, sempre que se cumpran os seguintes requisitos:

1.º) Non conteñan como colaterais instrumentos derivados que expoñen a entidade a un nivel de endebedamento ou perdas que excedan o valor do activo financeiro estruturado, e;

2.º) Cando se trate de instrumentos financeiros estruturados de entre os previstos no punto dous do artigo 11 desta orde, a operación no seu conxunto non poderá quedar desfeita por acontecementos ou eventos que afecten unha parte dos colaterais incluídos no activo financeiro estruturado.

d) Instrumentos financeiros derivados que sexan utilizados como instrumentos de cobertura dos compromisos asumidos en virtude das operacións de seguro.

e) As participacións en fondos de investimento que garantan a revalorización das participacións en contía e data, sempre que o regulamento de xestión do fondo pre-

vexa o cálculo do valor liquidativo e o reembolso das participacións nun prazo non superior a tres días.

f) Tesouraría. Equiparanse a tesouraría as participacións en fondos de investimento que garantan o reembolso das participacións diariamente e cuxa política de investimento exixa que o activo do fondo estea investido, polo menos nun 90 por cento, en valores ou instrumentos financeiros de renda fixa admitidos a negociación en mercados regulados e con prazo remanente de amortización ou reembolso non superior a 18 meses, e non poden adquirir valores de renda variable.

Resultarán igualmente admisibles activos financeiros negociables de entre os previstos neste punto 2, con vencemento certo e fluxos nominais igualmente certos en prazo, aínda que determinables en importe, cando o compromiso asumido na póliza se referencie aos índices ou valores que serven de referencia para determinar os fluxos dos activos financeiros.

Os activos asignados deberán contar cunha cualificación crediticia correspondente a algún dos tres primeiros grupos previstos no artigo 17 desta orde. Non resultará aplicable a exixencia anterior á tesouraría nin ás participacións en fondos de investimento.

Ningún dos activos relacionados anteriormente poderá ser emitido pola entidade que figure como tomador da póliza de seguro respectiva, ou por outra ou outras que constitúan con aquela unha unidade de decisión, nos termos do artigo 20.2 do Real decreto lexislativo 6/2004, do 29 de outubro, polo que se aproba o texto refundido da Lei de ordenación e supervisión dos seguros privados.

3. O tipo de xuro máximo polo que se avaliará a provisión matemática será o implícito de comparar o valor actual dos activos que verifiquen algunha das condicións enumeradas no punto 1 anterior, actualizados ao tipo que resulte de multiplicar a súa taxa interna de rendibilidade, deducida do seu prezo de adquisición, polas porcentaxes enumeradas no parágrafo seguinte, cos pagamentos previstos por prestacións e gastos.

Con carácter xeral as porcentaxes a que se refire o parágrafo anterior serán do 95, 92 e 89 por 100, segundo os títulos pertencen aos grupos 1 a 3 de entre os enumerados no artigo 17 desta orde. No caso das participacións en fondos de investimento, incluídas as equiparables á tesouraría, aplicaranse as porcentaxes correspondentes á cualificación crediticia da entidade xestora ou, no seu defecto, o 89 por 100. No caso de activos financeiros estruturados non negociables, aplicaranse as porcentaxes que correspondan á cualificación crediticia da estrutura ou, no seu defecto, á cualificación crediticia media que lles corresponda aos colaterais e á contraparte da permuta de fluxos. A Dirección Xeral de Seguros e Fondos de Pensións establecerá por resolución a sistemática e modo de aproximar a cualificación crediticia media.

Malia o anterior, a entidade poderá reducir o valor actual dos activos citados nos parágrafos anteriores nalgun dos importes seguintes:

a) Valor actual dos fluxos de cobramento elixidos pola entidade, actualizados ao tipo que resulte de multiplicar a taxa interna de rendibilidade dos activos, deducida do seu prezo de adquisición, polas porcentaxes enumeradas no parágrafo anterior. A exclusión de tales fluxos en ningún caso poderá supoñer o incumprimento dalgún dos requisitos do punto 1.

b) Valor actual do saldo financeiro positivo obtido ao final da operación que se prevé no punto 1, actualizado á taxa interna de rendibilidade media dos activos reducida nos correspondentes coeficientes por risco de crédito.

4. A entidade tomará nota, ao final de cada trimestre natural, da verificación do cumprimento ou non das hipóteses e requisitos recollidos neste método no libro de investimentos. De se producir algún incumprimento, a

entidade indicaráo no dito libro con especificación das actuacións oportunas para a súa emenda. Tanto a verificación como a indicación do seu resultado no libro de investimentos deberán estar completadas transcorridos tres meses desde o final de cada trimestre natural. Se despois doutros tres meses se continuase sen emendar o incumprimento posto de manifesto, resultará aplicable o disposto no artigo 33.4 do Regulamento de ordenación e supervisión dos seguros privados, salvo que se xustifiquen adecuadamente, ante a Dirección Xeral de Seguros e Fondos de Pensións, as medidas que se adoptarán.

Polo menos anualmente deberanse realizar análises prospectivas de escenarios sobre a evolución do exercicio do dereito de rescate. As ditas análises deberán estar baseadas en hipóteses prudentes e adecuadamente xustificadas que reflectan o comportamento real do exercicio do dito dereito. Se se apreciasen desviacións que puidesen xerar algún incumprimento dos requisitos exixidos nos puntos anteriores deste artigo, a entidade deberá prever as medidas que se adoptarán para garantir o seu cumprimento. As análises realizadas así como as medidas que se adoptarán en caso de desviacións deberán estar en todo momento á disposición da Dirección Xeral de Seguros e Fondos de Pensións.

5. A entidade poderá modificar a composición da carteira de investimentos asignados á operación, incorporando novas adquisicións en substitución das anteriores, sempre que se sigan cumprindo, en todo momento, os requisitos establecidos nesta orde.

6. Para os efectos do disposto no artigo 52.1.a) do regulamento, o valor contable, no caso dos títulos de renda fixa, estará composto polo prezo de adquisición máis a rendibilidade implícita positiva ou negativa e a explícita periodificada ata o momento da valoración.

Artigo 3. Adecuación dos investimentos asignados a determinadas operacións de seguro en función da relación entre valores actuais dos investimentos e as obrigacións, e do tratamento dos riscos inherentes á operación.

1. As operacións a que se refire o artigo 33.2.b) do Regulamento deberán cumprir os seguintes requisitos:

a) O valor actual dos fluxos de cobramento procedentes dos investimentos asignados á operación de seguro debe ser en todo momento igual ou superior ao valor actualizado dos fluxos probables correspondentes ás obrigacións derivadas dos contratos, determinado a tipos de xuro de mercado correspondentes ao prazo de cada fluxo.

b) As duracións financeiras corrixidas dos activos e os pasivos, calculadas a tipos de xuro de mercado, non poderán diferir entre si máis dun 20%. Esta condición verificarase mediante a seguinte expresión:

$$0,8 \leq \frac{\text{Duración_Correxida_Activos}}{\text{Duración_Correxida_Pasivos}} \leq 1,2$$

c) A sensibilidade, ante variacións dos tipos de xuro, dos valores actuais de activos e pasivos deberá ser equivalente. Para estes efectos deberanse analizar as variacións que se produzan nos valores actuais de activos e pasivos ante perturbacións, de magnitude de cen puntos básicos, nos tipos de xuros da curva utilizada correspondentes aos prazos que se consideren máis representativos, e deberase efectuar a análise para os prazos correspondentes ao primeiro e último dos fluxos previstos e para, polo menos, dous puntos intermedios máis da citada curva, de forma que exista entre cada un dos pun-

tos analizados unha distancia temporal de non menos de dous anos. Considerarase que as mencionadas perturbacións, introducidas nun só punto concreto da curva, se transmiten, atenuadas proporcionalmente, a todos os puntos que se encontren entre o considerado e o anterior e posterior. Cando o prazo residual da operación sexa inferior a seis anos, deberase efectuar a análise nos extremos da curva de tipos de xuro e en, polo menos, un punto intermedio, e cando o dito prazo sexa igual ou inferior a catro anos, bastará con efectualo con referencia aos extremos do citado prazo residual.

Para os efectos desta letra c) consideraranse sensibilidades equivalentes aquelas en que o cociente das variacións relativas dos valores actuais dos activos entre as variacións relativas dos valores actuais dos pasivos oscile entre 0,8 e 1,2.

A expresión mediante a cal se verificará o cumprimento das condicións de equivalencia, en canto á sensibilidade, para cada un dos puntos considerados máis representativos, nos termos recollidos nesta alínea c), será:

$$0,8 \leq \frac{\left(\frac{\text{Variación_VA_de_Activos}}{\text{VA_de_Activos}} \right)}{\left(\frac{\text{Variación_VA_de_Pasivos}}{\text{VA_de_Pasivos}} \right)} \leq 1,2$$

Onde:

Variación_VA_de_Activos = valor actual dos fluxos de activos, antes da perturbación, menos o valor actual deses mesmos fluxos de activos despois da perturbación.

Variación_VA_de_Pasivos = valor actual dos fluxos de pasivos, antes da perturbación, menos o valor actual deses mesmos fluxos de pasivos despois da perturbación.

VA_de_Activos = valor actual dos fluxos de activos, antes da perturbación.

VA_de_Pasivos = valor actual dos fluxos de pasivos, antes da perturbación.

Nestes cálculos utilizaranse os tipos de xuro de mercado.

Malia o anterior, tamén se considerará que as sensibilidades son equivalentes se se verifica que:

$$\left| \left(\frac{\text{Variación_VA_de_Activos}}{\text{VA_de_Activos}} \right) - \left(\frac{\text{Variación_VA_de_Pasivos}}{\text{VA_de_Pasivos}} \right) \right| < \text{Parámetro}$$

En cada escenario de análise, o valor do parámetro dependerá do número de anos afectados pola perturbación da curva do tipo de xuro, segundo a seguinte escala:

Parámetro	Número de anos
0,0010	5 ou superior
0,0008	4
0,0003	3
0,0001	2 ou inferior

Para un número de anos intermedio entre os niveis anteriores, o valor do parámetro obterase por interpolación lineal.

Para a aplicación do disposto neste artigo, a entidade deberalle remitir á Dirección Xeral de Seguros e Fondos de Pensións o soporte técnico e as definicións dos con-

ceptos financeiros utilizados. En particular, a indicada información deberá detallar:

- 1.º) A curva de tipos de xuro utilizada;
- 2.º) A definición da duración financeira e o método utilizado para o seu cálculo;
- 3.º) Os criterios utilizados para a selección dos tipos de xuro representativos e para a correspondente análise de sensibilidades.

2. Os activos que se poderán utilizar serán os previstos no punto 2 do artigo 2. Non obstante, e cos mesmos requisitos de cualificación, poderanse utilizar valores negociables de renda variable que se negocien en mercados regulados, sempre que se cumpran as seguintes condicións:

En ningún caso poderá estar investido en renda variable un importe superior ao 25 por 100 do valor da provisión matemática ao comezo da operación de seguro.

Os valores negociables de renda variable utilizaranse para a cobertura de pasivos con vencemento superior a dez anos desde a adquisición dos mencionados valores. En consecuencia, non se poderá investir inicialmente en renda variable un importe superior ao valor actual das prestacións e dos gastos que se satisfarán a máis de dez anos desde o inicio da operación de seguro, nin as adquisicións posteriores poderán facer que o volume total do investimento supere, no momento en que se efectúen, o valor actual das prestacións e dos gastos con vencemento superior a dez anos no dito momento.

En ningún caso o investimento en renda variable superará o 50 por 100 da provisión matemática en calquera momento.

Minimizarase o risco específico dos valores mediante a súa diversificación. As accións deberán ter unha frecuencia de negociación superior ao 80 por 100 dos días hábiles no último trimestre no mercado regulado en que se negocien e deberase procurar, ademais, unha razoable diversificación por sectores de actividade.

Para os efectos do punto 4.a) deste artigo, a rendibilidade que se asignará á renda variable non superará a taxa de rendibilidade media das obrigacións do Estado con duración inicial equivalente ou máis próxima á de cada un dos fluxos pasivos que se estean cubrindo cos valores de renda variable, ponderada polos prazos e importes correspondentes aos ditos fluxos e medida no momento da adquisición dos citados valores.

Cando resten cinco anos para o vencemento das prestacións cubertas con renda variable, e polo importe da diferenza entre a provisión matemática de toda a operación de seguro e o valor contable dos activos de renda fixa máis o valor de mercado dos de renda variable, a entidade asignará outros activos, non computados para cobertura do resto de provisións técnicas da entidade, que pertencen a algunha das categorías a que se refire o punto 2 do artigo 2 desta orde, que quedarán afectos a estas operacións. O importe que se asignará será dun quinto da diferenza cando resten cinco anos, un cuarto desta cando resten catro anos, un terzo desta cando resten tres anos, a metade desta cando resten dous anos e a totalidade cando reste un ano.

As plusvalías da carteira, a rendibilidade por dividendos, a venda dos dereitos de subscripción e calquera outro rendemento xerado pola carteira que, de ser o caso, se materialice, asignaranse unicamente a estas operacións.

Se durante o exercicio económico, a diferenza entre as plusvalías e as minusvalías derivadas do alleamento de títulos de renda variable fose negativa, a entidade deberá asignar polo dito importe novos activos a estas operacións, dos pertencentes a algunha das categorías a que se refire o punto 2 do artigo 2 desta orde.

Para os efectos da verificación do cumprimento dos requisitos contidos no punto 1, non se computarán os pasivos que se pretendan cubrir con renda variable.

En caso de se produciren excesos na cobertura das provisións técnicas atribuídas a estas operacións de seguro, non se poderá computar o dito exceso para a cobertura doutras provisións técnicas.

3. Polo menos ao final de cada trimestre natural verifícaranse os requisitos enumerados anteriormente, procedendo, de ser o caso, á adecuación dos activos e pasivos, do que quedará constancia no libro de investimentos. De se incumprir algún deles, a entidade indicará no dito libro, con especificación das actuacións oportunas para a súa emenda. Tanto a verificación como a indicación do seu resultado no libro de investimentos deberán estar completadas transcorridos tres meses desde o final de cada trimestre natural. Se despois doutros tres meses continuase sen emendar o incumprimento posto de manifesto, resultará aplicable o disposto no artigo 33.4 do Regulamento de ordenación e supervisión dos seguros privados, salvo que se xustifiquen adecuadamente, ante a Dirección Xeral de Seguros e Fondos de Pensións, as medidas que se van adoptar. Malia o anterior, en relación coas duracións financeiras, estas axustaranse como mínimo cada dúas revisións trimestrais.

4. O tipo de xuro que se aplicará no cálculo da provisión matemática obterase a través das seguintes fases:

a) Determinarase o valor actual dos activos actualizando os seus fluxos ao tipo de xuro que resulte de multiplicar a súa taxa interna de rendibilidade, deducida do seu prezo de adquisición, polas seguintes porcentaxes: 93, 90 e 87 por 100, segundo os valores pertencen aos grupos 1 a 3 de entre os enumerados no artigo 17 desta orde. No caso das participacións en fondos de investimento, incluídas as equiparables á tesouraría, aplicaranse as porcentaxes correspondentes á cualificación crediticia da entidade xestora ou, no seu defecto, o 87 por 100. No caso de activos financeiros estruturados non negociables aplicaranse as porcentaxes que correspondan á cualificación crediticia da estrutura ou, no seu defecto, a cualificación crediticia media que corresponda aos colaterais e ás permutas de fluxos certos ou predeterminados realizadas con entidades financeiras. A Dirección Xeral de Seguros e Fondos de Pensións establecerá por resolución a sistemática e modo de aproximar a cualificación crediticia media.

Para os anteriores efectos, á rendibilidade asignada aos valores de renda variable de conformidade co punto 2 aplicaráselle en todo caso o 93 por cento. Esta mesma porcentaxe aplicaráselles tamén ás participacións en institucións de investimento colectivo recollidas no punto 7.

b) O tipo de xuro que se utilizará no cálculo da provisión matemática será a taxa interna de rendibilidade implícita resultante de comparar os valores actuais determinados conforme a letra anterior cos cobramentos procedentes dos valores en carteira, considerando como procedentes da renda variable os correspondentes á rendibilidade atribuída a esta.

5. Así mesmo, será aplicable neste caso o disposto no artigo 2 desta orde en relación co valor contable dos activos afectos, unicamente no caso dos valores de renda fixa. Para os de renda variable computarase, para efectos de cobertura, o seu prezo de adquisición máis a rendibilidade atribuída neta dos dividendos percibidos.

6. As provisións por depreciación de investimentos financeiros en valores negociables de renda variable asignados ás operacións reguladas neste artigo, ás cales se refire o punto 2.2 da norma de valoración 5.^a do Plan de contabilidade das entidades aseguradoras, dotaranse con cargo á conta «Minusvalías en valores negociables de renda variable (artigo 33.2.b) do Regulamento de ordenación e supervisión de seguros privados)» que lucirá con signo negativo na partida VIII da agrupación «A. Capital e reservas», do pasivo do balance.

Cando se produza a reversión, total ou parcial, da depreciación rexistrada como provisión, reflectirase este feito mediante o correspondente cargo na conta representativa daquela, polo importe recuperado, con aboamento á conta «Minusvalías en valores negociables de renda variable (artigo 33.2.b) do Regulamento de ordenación e supervisión de seguros privados)».

Procederáse de forma análoga ao indicado no parágrafo anterior, pola totalidade da provisión, cando se alleen os valores negociables de renda variable. Neste último caso, reflectiranse as perdas producidas nunha conta de catro díxitos da conta 654 coa denominación «Perdas procedentes de valores negociables de renda variable (artigo 33.2.b) do Regulamento de ordenación e supervisión de seguros privados)»; de ser o caso, os beneficios producidos reflectiranse nunha conta de catro díxitos da conta 754 coa denominación «Beneficios procedentes de valores negociables de renda variable (artigo 33.2.b) do Regulamento de ordenación e supervisión de seguros privados)».

Na memoria integrante das contas anuais deberase incluír información específica sobre as provisións por depreciación de investimentos financeiros correspondentes a este tipo de operacións, indicando, como mínimo, os valores negociables de renda variable e aos cales corresponde a dotación das provisións efectuadas e o movemento experimentado por estas, con indicación dos saldos iniciais e finais.

En todo caso, para efectos do cálculo da marxe de solvencia, deducirase no cómputo do patrimonio propio non comprometido, de conformidade co disposto no artigo 59.1 do Regulamento de ordenación e supervisión de seguros privados, o importe das diferenzas negativas contabilizadas na partida «Minusvalías procedentes de valores negociables de renda variable [artigo 33.2.b)] do Regulamento de ordenación e supervisión de seguros privados), sen que sexa considerada partida negativa para efectos do punto 2.^o do citado artigo. En ningún caso computarán como partida positiva as plusvalías aplicadas á compensación de minusvalías.

7. As referencias feitas nos puntos anteriores á renda variable débense entender tamén realizadas ás accións e participacións en institucións de investimento colectivo de carácter financeiro que garantan o seu reembolso diariamente e aos fondos de investimento cotizados.

8. A Dirección Xeral de Seguros e Fondos de Pensións poderá, mediante resolución, desenvolver as particularidades operativas e as obrigacións de información das operacións a que se refire este artigo.

Artigo 4. *Grupo homoxéneo de pólizas.*

Para efectos do disposto nos artigos 2 e 3 desta orde, para o cálculo da provisión matemática poderanse agrupar aquelas pólizas que constitúan un grupo homoxéneo. Na creación dos distintos grupos homoxéneos de pólizas deberase formular como obxectivo esencial a salvagarda da totalidade dos dereitos dos tomadores, asegurados e beneficiarios. A entidade deberá conservar en soporte informático o detalle dos fluxos de pagamento probabiliados que corresponda, polo menos, a cada produto comercial incluído nos distintos grupos homoxéneos.

Artigo 5. *Inmunización a prima periódica.*

Os sistemas previstos nos artigos 2 e 3 desta orde resultarán aplicables ás pólizas con prima periódica, coas seguintes particularidades:

a) Os fluxos de cobramento incluírán os fluxos probables correspondentes a primas futuras.

b) Os fluxos de pagamento incluírán os fluxos probables correspondentes a prestacións e gastos derivados das citadas primas futuras.

c) En caso de que a entidade se acolla ao sistema previsto no artigo 33.2.a) do Regulamento de ordenación e supervisión de seguros privados, o tipo de xuro máximo polo que se avaliará a provisión matemática será o implícito de comparar: (i) o valor actual dos activos nos termos previstos no artigo 2.3 desta orde e, na data prevista para o seu cobramento, os fluxos previstos na letra a) anterior, con (ii) os pagamentos previstos por prestacións e gastos, incluídos os fluxos de pagamento previstos na letra b) anterior.

En caso de que a entidade se acolla ao sistema previsto no artigo 33.2.b) do Regulamento de ordenación e supervisión de seguros privados, o tipo de xuro que se aplicará no cálculo da provisión matemática será o implícito de comparar: (i) o valor actual dos activos nos termos previstos no artigo 3.4.a) desta orde e, na data prevista para o seu cobramento, os fluxos previstos na letra a) anterior, con (ii) os cobramentos procedentes dos valores da carteira, considerando como procedentes da renda variable os correspondentes á rendibilidade atribuída a esta, e, na data prevista para o seu cobramento, as primas futuras previstas na letra a) anterior.

Artigo 6. *Requisitos exixibles aos instrumentos derivados non negociados en mercados regulados do ámbito da OCDE.*

Os instrumentos derivados non negociados adquiridos polas entidades aseguradoras deberán cumprir os requisitos seguintes:

a) As contrapartes deberán ser entidades financeiras suxeitas a supervisión de autoridade de control dos Estados membros do Espazo Económico Europeo, ou suxeitas a supervisión prudencial de organismos supranacionais de que España sexa membro, dedicadas de forma habitual e profesional á realización de operacións deste tipo e que teñan solvencia suficiente. Para estes efectos, presumirase que a contraparte ten solvencia suficiente cando conte con cualificación crediticia favorable dunha axencia especializada de recoñecido prestixio e se inclúa entre os tres primeiros grupos de máis alta cualificación crediticia a que se refire o artigo 17 desta orde.

b) As operacións poderán quedar sen efecto en calquera momento por petición da entidade, de modo que as cláusulas contractuais de cada operación deberán permitir en todo momento a súa liquidación ou cesión a un terceiro. Para asegurar o cumprimento deste requisito, ben a contraparte ou ben o intermediario financeiro que asumise este compromiso e reúna os requisitos establecidos na alínea a) anterior, estarán obrigados a ofrecer cotizacións de compra e de venda con fins de negociación e peche de operacións que se axusten ás condicións de mercado en calquera momento por petición da entidade. A diferenza máxima en que oscilarán ambos os tipos de cotizacións deberase ter fixado en cada contrato, así como nos documentos informativos periódicos da entidade elaborados con posterioridade á súa sinatura. No caso de que se prevexa a cesión a un terceiro, este deberase subrogar na posición, como mínimo ao prezo que facilitase a contraparte ou o intermediario financeiro mencionados anteriormente para desfacer a operación na mesma data.

O cumprimento deste requisito pola entidade aseguradora tamén poderá quedar acreditado se polo menos un axente financeiro que cumpra os requisitos establecidos no artigo 1 desta orde ofrece prezos en firme de com-

pra e venda, que se axustan ás condicións vixentes no mercado en cada momento, de forma que lle permita á entidade realizar os seus investimentos ou pechar posicións ao citado prezo.

c) As cláusulas contractuais das operacións deberán incorporar documentación precisa acerca do método de valoración conforme o cal se vaian determinar as cotizacións sinaladas na letra anterior.

d) Cando a contraparte pertenza ao mesmo grupo que a entidade aseguradora, deberase poder probar que a operación se realiza a prezos de mercado. Presumirase que se realizou a prezos de mercado cando a contraparte levase a cabo outras operacións similares en condicións análogas con entidades non pertencentes ao grupo, ou cando a entidade pechase operacións nesas condicións con outra contraparte allea ao grupo.

e) Non resulta admisible a liquidación de posicións en instrumentos derivados con subxacentes non financeiros mediante a entrega física dos subxacentes.

f) No suposto de que a contraparte da entidade aseguradora poida liquidar periodicamente a operación antes do vencemento, esta deberase liquidar a valor de mercado, sen ningún tipo de penalización, desconto ou comisión a cargo da entidade aseguradora. Ademais, a liquidación anticipada deberalle ser advertida á entidade aseguradora con antelación suficiente, de forma que lle permita adquirir no mercado os activos precisos para lles dar cumprimento ás disposicións de ordenación e supervisión dos seguros privados.

Artigo 7. *Requisitos exixibles aos instrumentos derivados negociados en mercados regulados do ámbito da Organización para a Cooperación e o Desenvolvemento Económico (OCDE).*

Os instrumentos derivados adquiridos en mercados regulados do ámbito da Organización para a Cooperación e o Desenvolvemento Económico (OCDE) que cumpran as condicións eximidas pola Directiva 2004/39/CE, do Parlamento Europeo e do Consello, do 21 de abril, relativa aos mercados de instrumentos financeiros, deberán garantir a liquidez das posicións, e non resultará admisible a súa liquidación, cando contén con subxacentes non financeiros, mediante a entrega física dos subxacentes. A liquidez das posicións entenderase acreditada cando o mercado conte cunha cámara de compensación.

Artigo 8. *Perdas potenciais en instrumentos derivados contratados como investimento.*

Para efectos da determinación das perdas potenciais a que se refire o artigo 52 ter do Regulamento de ordenación e supervisión dos seguros privados, as posicións abertas en instrumentos derivados só se entenderán pechadas mediante a subscripción dun instrumento derivado de signo contrario, se as contrapartes de ambos os instrumentos derivados coinciden ou, no seu defecto, se a contraparte do instrumento financeiro inverso ten unha cualificación crediticia non inferior aos tres primeiros grupos de máis alta cualificación crediticia a que se refire o artigo 17 desta orde.

Artigo 9. *Activos financeiros estruturados.*

1. Para os efectos do disposto no artigo 50.1.b) do Regulamento de ordenación e supervisión dos seguros privados entenderase por activo financeiro estruturado aquel activo composto por combinación de dous ou máis activos, instrumentos derivados ou combinación de ambos que se instrumenten a través dun único negocio xurídico, en que conorra algunha das circunstancias seguintes:

a) Que o valor de mercado do activo financeiro estruturado veña determinado polo valor de mercado dos instrumentos financeiros e activos que o integran, salvo que o activo financeiro estruturado conteña instrumentos derivados cuxo subxacente se referencie a unha cualificación, índice ou evento de crédito.

b) Que o risco de crédito do activo estruturado dependa do risco de crédito dos instrumentos que o integran, denominados colaterais, ou que o activo financeiro estruturado conteña instrumentos derivados cuxo subxacente se referencie a unha cualificación, índice ou evento de crédito, ou que o risco de crédito do activo estruturado dependa do risco de crédito dos instrumentos que o integran.

2. No terán a consideración de activos financeiros estruturados os seguintes bens e dereitos:

a) Aqueles activos que poidan ser considerados aptos para o investimento das provisións técnicas conforme o disposto nos puntos 5.a) e 6 do artigo 50 do Regulamento de ordenación e supervisión dos seguros privados.

b) Os activos financeiros, distintos dos activos financeiros estruturados non negociables, en que a data de todos os seus fluxos sexa fixa, a súa contía determinada ou determinable mediante un método obxectivo ao se emitir o activo, e que incorporen instrumentos derivados, distintos dos previstos na letra b) do punto anterior, que poidan afectar o importe de calquera dos seus fluxos ou a data de cobramento ou vencemento, sempre que se garanta á data de vencemento do activo o importe total satisfeito ou que se vaia satisfacer na subscripción sen considerar os gastos inherentes á operación. Se o activo fose adquirido nun momento posterior conforme as condicións existentes no mercado, atenderanse as condicións da emisión para a súa cualificación como estruturado ou non.

Artigo 10. *Clases de activos financeiros estruturados.*

Os activos financeiros estruturados clasifícanse en:

1. Activos financeiros estruturados negociables, que son aqueles que, tendo sido admitidos a negociación en mercados regulados no ámbito da Organización para a Cooperación e o Desenvolvemento Económico (OCDE), sexan susceptibles de tráfico xeneralizado e impersoal nun mercado financeiro nos termos previstos no artigo 50.1.a) do Regulamento de ordenación e supervisión dos seguros privados.

2. Activos financeiros estruturados non negociables, que son aqueles que non reúnen algunha das condicións anteriores.

Artigo 11. *Requisitos dos activos financeiros estruturados negociables.*

Un. Os activos financeiros estruturados negociables a que se refire o artigo 9.1.a) desta orde estarán sometidos ás seguintes condicións:

1. Para a súa consideración como investimento apto para a cobertura das provisións técnicas deberán cumprir os seguintes requisitos:

a) Liqueidez. Entenderase cumprido o requisito de liquidez cando os activos financeiros estruturados cumpran calquera dos requisitos previstos nos parágrafos 1.º, 2.º e 3.º do artigo 50.1.a) do Regulamento de ordenación e supervisión dos seguros privados.

b) Seguranza. Deberán dispoñer dunha cualificación crediticia, actualizada anualmente, emitida por unha axencia de cualificación de recoñecido prestixio de, polo menos, A.

2. Deberán así mesmo cumprir, ademais dos principios contidos no artigo 49 do Regulamento de ordenación e supervisión dos seguros privados e coas particularidades que a continuación se indican, as seguintes condicións:

a) Os valores representativos dos activos financeiros estruturados negociables previstos nesta disposición deberán cumprir as regras de titularidade e situación dos investimentos a que se refire o artigo 51 do Regulamento de ordenación e supervisión dos seguros privados e de valoración dos investimentos a que se refire o artigo 52 do Regulamento de ordenación e supervisión dos seguros privados.

b) Os límites de diversificación e dispersión a que se refire o artigo 53 do Regulamento de ordenación e supervisión dos seguros privados aplicaranse con referencia ao activo financeiro estruturado.

c) Congruencia monetaria. Para efectos do disposto no artigo 55 do Regulamento de ordenación e supervisión dos seguros privados entenderase como moeda de realización dos referidos activos financeiros estruturados, a súa moeda de reembolso.

Dous. Os activos financeiros estruturados negociables, a que se refire o artigo 9.1.b) desta orde, estarán sometidos aos seguintes requisitos:

1. Para a súa consideración como investimento apto para a cobertura das provisións técnicas, deberán cumprir as seguintes condicións:

a) Liqueidez. Entenderase cumprido o requisito de liquidez cando os activos financeiros estruturados cumpran calquera dos requisitos previstos nos parágrafos 1.º, 2.º e 3.º do artigo 50.1.a) do Regulamento de ordenación e supervisión dos seguros privados.

b) Seguranza. Deberán dispoñer dunha cualificación crediticia, actualizada anualmente, emitida por unha axencia de cualificación de recoñecido prestixio de, polo menos, AA.

2. Deberán así mesmo cumprir, ademais dos principios contidos no artigo 49 do Regulamento de ordenación e supervisión dos seguros privados e coas particularidades que a continuación se indican, as seguintes condicións:

a) Os valores representativos dos activos financeiros estruturados negociables deberán cumprir as regras de titularidade e situación dos investimentos a que se refire o artigo 51 do Regulamento de ordenación e supervisión dos seguros privados e de valoración dos investimentos a que se refire o artigo 52 do Regulamento de ordenación e supervisión dos seguros privados.

b) Os límites de diversificación e dispersión a que se refire o artigo 53 do Regulamento de ordenación e supervisión dos seguros privados aplicaranse con referencia ao activo financeiro estruturado.

c) Congruencia monetaria. Para efectos do disposto no artigo 55 do Regulamento de ordenación e supervisión dos seguros privados entenderase como moeda de realización dos referidos activos financeiros estruturados, a súa moeda de reembolso.

Artigo 12. *Activos financeiros estruturados non negociables.*

1. Para a súa consideración como investimento apto para a cobertura das provisións técnicas os activos financeiros estruturados non negociables deberán cumprir os requisitos previstos no artigo 6 desta orde.

2. Deberán así mesmo respectar, ademais dos principios contidos no artigo 49 do Regulamento de ordenación e supervisión dos seguros privados e coas particularidades que a continuación se indican, os seguintes requisitos:

a) Os valores representativos dos activos financeiros estruturados non negociables deberán cumprir as regras de titularidade e situación dos investimentos a que se refire o artigo 51 do Regulamento de ordenación e supervisión dos seguros privados e de valoración dos investimentos a que se refire o artigo 52 do Regulamento de ordenación e supervisión dos seguros privados.

b) Os colaterais deben estar identificados e pertencer a algunhas das categorías previstas no artigo 50 do Regulamento de ordenación e supervisión dos seguros privados, e estar depositados nunha entidade financeira do Espazo Económico Europeo nos termos previstos no artigo 51 do Regulamento de ordenación e supervisión dos seguros privados.

c) Os límites de diversificación e dispersión a que se refire o artigo 53 do Regulamento de ordenación e supervisión dos seguros privados aplicaranse con referencia a cada un dos colaterais da estrutura.

d) Congruencia monetaria. Para efectos do disposto no artigo 55 do Regulamento de ordenación e supervisión dos seguros privados entenderase como moeda de realización dos referidos activos financeiros estruturados, a súa moeda de reembolso.

3. As cláusulas contractuais dos activos financeiros estruturados non negociables en ningún caso poderán prever a súa liquidación unilateral anticipada por acontecementos ou feitos que afecten a solvencia ou situación financeira da entidade aseguradora adquirente destes.

4. Os requisitos previstos nos parágrafos anteriores deste artigo resultarán igualmente aplicables aos activos financeiros estruturados que, tendo carácter de negociables nos termos previstos no artigo 10.1 desta orde, non cumpran todos e cada un dos requisitos que para eles establece o seu artigo 11.

Artigo 13. *Permutas de fluxos certos ou predeterminados.*

1. Para os efectos da regulación de ordenación e supervisión dos seguros privados enténdense por permutas de fluxos certos ou predeterminados aquelas permutas de fluxos entre unha entidade aseguradora e unha entidade financeira cuxos fluxos non se referencien a uns tipos de xuros que actúan como subxacentes.

2. As permutas de fluxos certos ou predeterminados contratadas para a cobertura das provisións técnicas deberán cumprir os requisitos exixidos para os instrumentos derivados, non negociados en mercado, regulados do ámbito da Organización para a Cooperación e o Desenvolvemento Económico (OCDE) previstos no artigo 6 desta orde.

Artigo 14. *Activación e aptitude para cobertura dos recobramentos no seguro de crédito e caución.*

1. De acordo co previsto no número 3 da norma de valoración sexta do Plan de contabilidade das entidades aseguradoras, poderán activar os recobramentos aquelas entidades que operen no seguro de crédito e caución, utilizando para iso métodos estatísticos que cumpran os requisitos que, para a provisión de prestacións, se establecen nos puntos 1 e 3 do artigo 43 do Regulamento de ordenación e supervisión dos seguros privados. Ademais, será necesario que con periodicidade non superior a dous anos se efectúe unha valoración por experto independente contrastando a bondade dos cálculos realizados. Na memoria das contas anuais deberanse explicar detallada e xustificadamente as hipóteses e métodos de cálculo utilizados.

2. De conformidade co previsto no artigo 50.19 do Regulamento de ordenación e supervisión dos seguros privados, para efectos da valoración para cobertura de

provisións técnicas os recobramentos activados computaranse no 80 por 100 do importe activado.

Artigo 15. *Aptitude para cobertura de provisións técnicas dos seguros agrarios combinados.*

Para as entidades aseguradoras que operan no sistema de seguros agrarios combinados, regulado na Lei 87/1978, do 28 de decembro, serán aptos para a cobertura das provisións técnicas correspondentes ás ditas operacións os créditos que deriven delas fronte á «Agrupación Española de Entidades Aseguradoras de los Seguros Agrarios Combinados, Sociedad Anónima», ata o importe das mencionadas provisións.

Artigo 16. *Concepto de sinistralidade.*

Enténdese por sinistralidade a suma do importe das prestacións e dos gastos imputables ás prestacións pagados pola entidade en cada exercicio, corrixida pola variación da provisión de prestacións.

Artigo 17. *Cualificacións aplicables para a determinación das primas de risco que se aplicarán, de ser o caso, na valoración dos títulos de renda fixa.*

Para efectos do disposto na norma de valoración 5.^a 1.f) do Plan de contabilidade de entidades aseguradoras, en relación coa homoxeneización da calidade do emisor ou das condicións da emisión, establécese a seguinte clasificación de catro grupos para a aplicación das primas de homoxeneización que se indican na citada norma:

Grupo 1: AAA e AA.

Grupo 2: A.

Grupo 3: BBB.

Grupo 4: BB.

A existencia de subdivisións realizadas polas diferentes axencias de cualificacións non afectarán a asignación realizada no anterior cadro.

As emisións ou emisores con cualificacións inferiores ás anteriores deberán ser obxecto de corrección valorativa por risco de cobramento no importe estimado de non-pagamento, para o cal se terá en consideración a cualificación atribuída pola axencia correspondente.

En caso de que o emisor ou a emisión tivesen dúas ou máis cualificacións, a prima de homoxeneización que se aplicará será a media aritmética das correspondentes a cada unha das cualificacións.

Artigo 18. *Concepto de grupo homoxéneo nos fondos de investimento mobiliario.*

Para efectos do establecido no punto 2.2 da norma de valoración 5.^a do Plan de contabilidade das entidades aseguradoras, constituirán un grupo homoxéneo independente as participacións en fondos de investimento mobiliario establecidos no Espazo Económico Europeo e sometidos a coordinación de conformidade coa Directiva 85/611/CEE, pola que se coordinan as disposicións legais, regulamentarias e administrativas sobre determinados organismos de investimento colectivo en valores mobiliarios (OICVM) e, por tanto, no cálculo das correccións valorativas das ditas participacións poderanse compensar plusvalías e minusvalías de diferentes fondos, sen que en ningún caso se poida recoñecer o importe positivo derivado das diferenzas positivas menos as diferenzas negativas.

Quedarán excluídos deste grupo homoxéneo as participacións en fondos especializados en valores non negociados.

Disposición adicional única. *Tipo de xuro técnico aplicable aos contratos de seguro que instrumenten compromisos por pensións das empresas con traballadores a teor do establecido na disposición adicional primeira do texto refundido da Lei de regulación dos plans e fondos de pensións, aprobado polo Real decreto legislativo 1/2002, do 29 de novembro.*

Conforme o establecido no punto 2 do artigo 33 do Regulamento sobre a instrumentación dos compromisos por pensións das empresas cos traballadores e beneficiarios, aprobado polo Real decreto 1588/1999, do 15 de outubro, o tipo de xuro técnico aplicable aos contratos de seguro regulados no seu capítulo III será o que resulte da aplicación das normas contidas no Regulamento de ordenación e supervisión dos seguros privados, aprobado polo Real decreto 2486/1998, do 20 de novembro.

Disposición derogatoria única. *Derogación normativa.*

Quedan derogados os artigos 2, 3, 4, 5, 6, 7, 8, 9, 11 e 12 da Orde do 23 de decembro de 1998, pola que se desenvolven determinados preceptos da normativa reguladora dos seguros privados e se establecen as obrigacións de información como consecuencia da introdución do euro; a Orde do 24 de xullo de 2001, pola que se aproban os modelos de información que subministrarán as entidades aseguradoras; a Orde ECO/77/2002, do 10 de xaneiro, pola que se modifica a Orde do 23 de decembro de 1998 pola que se desenvolven determinados preceptos da normativa reguladora dos seguros privados e se establecen as obrigacións de información como consecuencia da introdución do euro, e se desenvolve a norma de valoración 5.ª 2.2 do Plan de contabilidade das entidades aseguradoras; e cantas disposicións de igual ou inferior rango se opoñan ao disposto nesta orde.

Disposición derradeira única. *Entrada en vigor.*

Esta orde entrará en vigor o día seguinte ao da súa publicación no *Boletín Oficial del Estado*.

Os requisitos previstos para os activos financeiros estruturados nos artigos 9, 10, 11 e 12 só serán exhibibles cando fosen contratados a partir da entrada en vigor desta orde.

Madrid, 16 de febreiro de 2007.–O vicepresidente segundo do Goberno e ministro de Economía e Facenda, Pedro Solbes Mira.

MINISTERIO DE FOMENTO

3691 *RESOLUCIÓN do 25 de xaneiro de 2007, da Dirección Xeral de Transportes por Estrada, pola que se rectifican os modelos oficiais de certificados de capacitación profesional previstos no anexo A da Orde do 28 de maio de 1999. («BOE» 46, do 22-2-2007.)*

A Orde do 28 de maio de 1999 pola que se desenvolve o capítulo I do título II do Regulamento da Lei de ordenación dos transportes terrestres, en materia de expedición de certificados de capacitación profesional, no seu anexo A inclúe o modelo oficial de certificado de capacitación profesional. Na nota (1) a pé de páxina no citado anexo constan os distintivos dos Estados membros da Unión Europea, facéndose referencia expresa a cada un. Como consecuencia da posterior adhesión de novos Estados faise necesario modificar a

indicada nota incorporando así ao ordenamento interno os correspondentes preceptos das directivas 2004/66/CE do Consello, do 26 de abril de 2004, pola que se adaptan as directivas 1999/45/CE, 2002/83/CE, 2003/37/CE e 2003/59/CE do Parlamento Europeo e do Consello e as directivas 77/388/CEE, 91/414/CEE, 96/26/CE, 2003/48/CE e 2003/49/CE do Consello, nos ámbitos da libre circulación de mercadorías, a libre prestación de servizos, a agricultura, a política de transportes e a fiscalidade, como consecuencia da adhesión da República Checa, Estonia, Chipre, Letonia, Lituania, Hungría, Malta, Polonia, Eslovenia e Eslovaquia; 2006/103/CE do Consello, do 20 de novembro de 2006, pola que se adaptan determinadas directivas no ámbito da política de transporte, con motivo da adhesión de Bulgaria e Romanía.

Na súa virtude, esta dirección xeral resolveu:

A nota (1) a pé de páxina do anexo A da Orde do 28 de maio de 1999 pola que se desenvolve o capítulo I do título II do regulamento da Lei de ordenación dos transportes terrestres, en materia de expedición de certificados de capacitación profesional, substitúese pola seguinte:

«(1) Distintivo do Estado: (B) Bélxica, (BG) Bulgaria, (CZ) República Checa, (DK) Dinamarca, (D) Alemaña, (EST) Estonia, (GR) Grecia, (E) España, (F) Francia, (IRL) Irlanda, (I) Italia, (CY) Chipre, (LV) Letonia, (LT) Lituania, (L) Luxemburgo, (H) Hungría, (M) Malta, (NL) Países Baixos, (A) Austria, (PL) Polonia, (P) Portugal, (RO) Romanía, (SLO) Eslovenia, (SK) Eslovaquia, (FIN) Finlandia, (S) Suecia, (UK) Reino Unido.»

Madrid, 25 de xaneiro de 2007.–O director xeral de Transportes por Estrada, Juan Miguel Sánchez García.

MINISTERIO DA VIVENDA

3698 *ORDE VIV/361/2007, do 14 de febreiro, pola que se establecen as condicións, os requisitos e o procedemento aplicables á concesión das subvencións excepcionais en materia de vivenda, para reparar os danos causados polos incendios forestais na Comunidade Autónoma de Galicia, ao abeiro do Real decreto lei 8/2006, do 28 de agosto. («BOE» 46, do 22-2-2007.)*

A vaga de incendios acaecidos na Comunidade Autónoma de Galicia durante os días 4 ao 14 de agosto de 2006 tivo graves repercusións, xa que os lumes se produciron en zonas moi próximas a núcleos urbanos e ás vivendas no ámbito rural, o que, en ocasións, fixo necesario o seu desaloxo.

Para efectos de paliar os danos ocasionados, adoptouse o Real decreto lei 8/2006, do 28 de agosto, polo que se aproban medidas urxentes en materia de incendios forestais na Comunidade Autónoma de Galicia.

O seu artigo 9 dedícase ás axudas excepcionais en materia de vivenda, tanto para aluguer de vivendas como para a reparación, rehabilitación e reconstrución destas e faculta o Ministerio de Vivenda para regular o procedemento da súa concesión, así como para establecer determinados requisitos dos solicitantes.

Pola súa parte, a disposición derradeira segunda do Real decreto lei 8/2006, do 28 de agosto, faculta os distintos titulares dos departamentos ministeriais, no ámbito das súas respectivas competencias, para ditar as disposicións necesarias e establecer os prazos para a execución das medidas previstas nel.

Na tramitación déuselles audiencia ás organizacións e asociacións recoñecidas pola lei que agrupan ou repre-